

修武縣志卷九

修武縣知縣馮繼照纂輯

列女傳

易之家人六二在中饋无攸遂貞吉女子之正也若喪其所天之死靡他傷矣况乎衰親弱子門祚寒微處婦道之窮而終遂婦德之正表揚之典非所以發微闡幽而成陰教乎然非有力者不能以名達於

朝道光十三年復由禮部核準彙請總坊雖在鄉僻窮發皆得仰邀綽楔然則今之采入志乘者卽以備後之

修武縣志

卷九 列女傳

旌揚者也敢不慎歟

唐

趙氏女山陽人父盜鹽當論死女詣官訴曰追飢而盜救死耳情有可原能原之邪否則請與俱死有司義之許減父死女曰身今爲官所賜願毀服依浮屠以報卽截耳自誓侍奉父疾卒不嫁

新唐書列

女傳

明

以節烈著者

秦氏張杲妻適杲三月杲以讐誣死秦屬其舅爲營壙令寬大舅未之知也杲柩至秦自縊遂同葬

時有作同穴記表之

王氏武陟人武生薛復亨妻復亨因母病祝以身代未幾果病且劇與王訣王曰君為母死妾且為君死復亨卒王自縊柩前萬曆七年旌

郭氏杜芳偉妻年十九崇禎五年流寇掠境恐為

所污投窰而死邑人王玉鉉弔之以詩崇禎壬申月已酉流

氛自晉借天狗九月長驅入甯邑甯邑無兵城不

守可憐士女生別離盡被賊兵虜之走惟有郭氏

未二十恐作人間失節醜荒巖幸有千尺窰一躍

珠泥碎身首古來男子振綱常反被婦人有

我適聞之贈以歌罷涕零奠之酒願畱青史慰芳魂上與天長下地久

孫烈媛湛一嫡配邑人范正脈弔之以詩弱媛戈鏃際捐

身如等閒盟心羞拔淚對面罷施髮晚日胭脂淡

墳松琥珀斑芳魂應自慰明月現聲還寇弩而城

修武縣志

卷九

列女傳

二

閩閩中丞別身潘休嗟白鬢荀莫感傷神素月見常流漢慈雲未斷雲牛衣曾灑淚寵非到新珉見

范介子龍圖詩草注湛一嫡配失姓味詩意是崇

禎五年流賊破城氏懼辱捐身者

李女許字盧安義未婚而安義卒女喪服往弔不

肯歸葬夫之日持刃刺喉家人力救得免事聞郡

守諭父母勸女守節養姑乃毀容紡績以供菽水

崇禎壬申遭流寇之亂自經於土洞中邑令為具

棺以殮康熙庚午文學杜芳泰盧槃等葬之南岡

立石紀事

薛氏生員楊某妻流寇之亂懼辱抱嬰稚自投於

水

以節孝著者

秦氏姜彥深妻少寡紡織事姑洪武二十八年旌

秦氏李允妻年十八夫亾撫孤苦節年八十五卒

成化五年旌

董氏陳芳妻芳以明經官遼州抵任數日卒子未

周歲董扶櫬歸葬守節教子年八十三卒宏治間

旌

趙氏金璽妻夫亾守節事翁姑以孝聞宏治間旌

張氏劉鈺妻鈺隨父幹之官溺死張年二十撫孤

守節及舅卒營葬盡禮年七十餘卒詔旌之

馬氏許某妻未婚而夫亾孝養翁姑苦志守節當

修武縣志

卷九

列女傳

三

道皆紀以詩

明河北道僉事邢雲路五絕三首延陵猶有劍息壤未寒盟但以身相許

何須問死生

偕老原無分于歸幸有家宣為陵上栢不作路傍花不識夫君面應憐處子身矢

心原一死生為舅姑貧

曹氏楊巍妻巍疾革與曹訣曰汝雖孕男女未卜

柰何曹斷髮自誓巍卒二月生子撫育甚至子卒

又撫其孫年七十五卒嘉靖十一年旌

王氏師舉妻夫亾奉七旬衰姑龐氏盡孝撫孤成

立孤又亾撫其孫四十餘年詔旌之

姜氏王三省妻三省疾時痛母失倚氏泣諾夫亾

事姑以孝聞撫子孫成立守節五十年詔旌之

李氏蘇海妻海卒遺孤曰崑曰崙崑娶張氏生子

秉彝崙娶李氏無子崙崙相繼天秉彝娶李氏又天四氏撫嗣苦節學使者以一門四節旌之海爲宋旗驥使蘇立後

崔氏秦來鳳妻鳳亾無子崔依姪以居苦節六十餘年

馬氏秦陞妻夫亾苦志撫孤年九十以節終

田氏薛鍊妻守節四十餘年邑令旌其門

薛氏史載賢妻年十九夫亾氏克孝舅姑苦節終身邵邑侯旌其門

王氏龐錦妻年十八夫亾無子苦節六十六年而卒

修武縣志

卷九 列女傳

四

宋氏吳自修妻撫孤守節七十餘年

燕氏王大妻夫亾守節事姑以孝聞

陳氏王孜妻孜亾兩月生一子撫之守節

宋氏崔淇妻淇亾撫孤守節

秦氏李鍊妻鍊亾撫孤守節

李氏解元王玉鉉妻二十二歲夫亾教子漸德成名守節五十餘年

國朝

以節烈著者

焦氏李守科

或作利

妻夫他往與女三姐同居比鄰

吳甲入室彊暴母女堅拒被殺康熙十九年旌

薛氏傅文鳳妻年十九將婚鳳忽病篤時議改期
薛聞之曰改期不愈將置我何地父母憐而遣之
夫亾越五年夫弟授室慨然曰奉姑有人可從夫
地下矣絕食八日死雍正三年旌

孫勣譔傅文鳳妻薛氏節孝傳

勣山東德州人

節孝修武縣庠生傅文鳳妻薛氏邑人薛道生女
也年十九于歸有日文鳳已病將不起父母欲改
期女曰改期則病可愈乎曰未可知也然則何以
改爲父母哀其志及期遣嫁既入門卽侍夫疾衣
不解帶舅姑憐之諭令少息婦曰夫一息猶存婦
忍夫死而不目擊乎如是者旬有四日而夫歿婦

修武縣志

卷九

列女傳

五

矢死以殉舅姑泣曰汝夫死而弟且幼吾二老人
何依幸汝賢且孝其念老人因慟哭婦拭淚正色
曰舅姑有命其敢違請姑無死以事舅姑撫幼叔
也所親或勸別適得聘金以養老人婦太息曰是
辱吾舅姑也吾十指尙存何患無養言者慚而去
乃躬勤紡績寒暑晝夜無閒粗糲自安而甘旨無
缺又三年而舅歿哀禮竝至旣爲夫弟納婦每以
勤儉孝養勸之居數月知叔與娣循循由禮可以
事姑也喜而歎曰吾無後憂矣遂絕食死將死語
姑曰婦安儉素幸勿以新衣殮遺婦以不安也姑
從之殮以所常御敝服史官孫勣曰慷慨赴死易

從容就義難若傅文鳳妻薛氏可謂能爲其難矣夫苟自見以爲難則未有能就義者若薛氏者蓋其中心安之而履焉如素知倫常之重不知有死生之殊者也嗚呼天下讀書窮理號爲士大夫者愧此多矣薛氏庶人子耳而能若是是不可以無傳也余故樂爲書之

王氏陳家節

或無家字

妻夫早逝里人彊有力者欲奪

其志氏懷刃自衛生遺腹子子又死於寇事姑益孝姑歿營葬畢歎曰一家骨肉盡矣我何用生爲遂整衣自縊

李氏王得祿妻事姑孝姑沒祿亾無子李營葬畢

修武縣志

卷九

列女傳

六

縊於墓側

陳氏朱諤妻幼有志操外舅吳周聚奇之年十九適諤三月而諤亾陳哀慟欲殉念舅姑老乃止後舅姑相繼逝歎曰吾可以死矣遂不食而卒

陳氏薛永祺妻年十七夫亾矢志不二事女紅以養姑姑亾營葬畢絕食而死

王氏范栩妻年十五適栩十八日栩亾欲以身殉念姑老無依而止及姑卒營葬畢絕食五日卒

范氏姬大龍妻夫亾無子堅志守節姑悍不仁數加譴責人有勸之嫁者輒義形於色後遭虐彌甚絕其飲食遂溺井死

闕氏劉鬻妻夫亡無子即日自經以殉

楊烈女名菊姐父為縣役年十八未字家苦貧偕母拾遺穗女先歸秦某素無賴入室狎侮之女大呼鄰嫗出視秦始竄女羞忿自縊乾隆二十二年旌

徐氏龐景元妻年二十四夫亡立嗣治葬畢自縊死乾隆二十八年旌

李氏齊天祥妻性貞烈十九歲于歸結縭三月夫病親奉湯藥衣不解帶者三年年二十一夫歿屢遭歲荒翁姑欲氏改適氏痛哭絕氣者數次夫喪畢自縊死年二十四道光十三年稟請總坊

修武縣志

卷九 列女傳

七

王氏李有祿妻年二十五夫亡欲殉家人勸以翁姑在堂遂代夫盡子職孝養無缺立嗣又殤復取姪孫為子嗣及翁姑相繼歿喪葬踰月曰吾事畢矣不食而死年六十五道光十三年稟請總坊

趙氏薛修和繼室年二十歲于歸結縭八月夫亡欲殉翁止之曰吾年老不能動作前室遺孤二無人撫養汝亡吾何賴焉氏泣涕從命以紡績度日後翁姑歿為子取婦語其子曰吾事畢矣越數日

自縊死年五十七道光十三年稟請總坊

教諭張宗泰

節婦詩節義非所慕妾心祇自蠲妾身為君婦伉儷未終年緣淺恩自深土石甘同捐劇奈君去日費志赴重泉二老猶在堂蒼蒼各華顛前婦遺骸

葬宛宛難自全忍淚復忍死代補有恨天等閒

五秋翁姑送長眠兒姪兒有室重任釋弱肩初願
要一遂妾心金釧堅不作慷慨死從容亦怡然故
人久相待無庸愴號鵲

劉氏李天祥妻年二十四夫亾氏有淑名初寡居
媒灼爭叩父母之門父母卻之氏不知也葬夫畢
歸省父母父母勉其守節且微示以生不如死之
義氏慨然曰兒本欲終夫喪然後自爲計今二老
憂兒如此兒聞命矣歸家卽自縊道光十三年彙
請總坊

殷氏張奎元繼室年二十一夫亾悲泣不食因念
翁姑年老夫嗣未立勉進飲食旣翁姑繼歿夫弟
一元生子梅貴立爲後乘聞扃戶自縊道光十三

修武縣志

卷九

列女傳

八

年彙請總坊

秦烈女幼字同里祝廷義之子以家貧童養於祝
歲大祿父玉誘女改聘適祝夫婦出外玉數逼之
女度不能拒憤投井死時年甫十五諸生吳屏等
立石表其墓

教諭蔣周南秦烈女墓表

女子能完貞全節固閨閣中偉人也古有迫於尊
長而矢志靡他若截髮割耳自毀其容往往見諸
史冊然其人多在從夫後一旦喪其所天不幸父
母不諒其志備受凌逼遂致殘軀殉節未有年未
及笄卽能矢志守死如修邑秦烈女者邑諸生吳

屏等既上其事於前邑侯宛平朱公以予司教於茲土也繼來告曰烈女姓秦其父秦玉居邑之城北門女幼卽許字同里祝廷義之子某撫養於祝以待年祝家故貧傭佃自給歲值旱荒烈女終日不得飽然佐翁姑汲井灌園無怨色父秦玉貧無行以年饑不能自存屢欲賣女女泣而拒之者數矣而玉日偵探祝氏門思於路隙掠女以遂厥謀女以爲訴之翁姑父將得不良名苟徇父欲則違從一義計莫如死黃昏後投身於井時在乾隆五十年三月三日女年僅十五耳閭里無不悲其意而重其節未幾朱邑侯移牘於學予召詢其族鄰

修武縣志

卷九

列女傳

九

僉云信然將爲之申其事請

旌於朝祝聞之辭初女之死也衣以薪而葬之道左越歲邑侯江左沈公下車迺衷以四字之扁吳生等謂烈女翁姑皆農人貧無立錫地不如刻石樹於烈女之墓庶可不朽也予爰以所聞書於石以從表墓之例云爾

李氏許鳳岐妻二十三歲于歸婦道克謹鳳岐病逾年奉湯藥無倦疾革與訣曰汝無子祖父父母有弟可以承奉我死汝卽改適氏涕泣誓必死夫卒仰藥自盡道光五年旌

侯氏崔弁羣妻十九歲于歸事孀姑飲食必親調

衣履必手製處婦姒以和年二十五夫亾欲殉姑
勸之乃攜衾裯與姑共處姑體不適恆終夜撫摩
姑卒營葬畢立石墓側嘔血數升家人扶歸取姒
克壯爲夫嗣與婦姒談笑託以身後事婦姒疑之
氏佯笑曰人生死何常聊爲萬一之慮耳翌日家
人怪其晏起啟門入視已投繯矣道光十一年旌
馬氏范鍾育妻年十九子歸幼喜闡節義事翁姑
能得懼心二十三歲夫亾投繯數次賴救得蘇泣
曰失所天矣何以生爲且兩叔皆已婚娶孝養有
人勿再活我會母死氏歸葬母畢泣別其父曰母
衰病需人扶養今葬矣父尙健吾將從夫於地下

修武縣志

卷九

列女傳

十

至家夜半閉戶沐浴更衣自縊道光十二年旌
范氏張愫妻年二十夫亾卽欲自盡翁姑勸止之
氏紡績以奉取堂姪承宗爲嗣越六載翁姑相繼
亾服闋爲承宗娶妻語人曰吾事已畢可從夫於
地下矣不食七日而亾

王貞女幼許配馬寅爲妻年十九未于歸而夫亾
女請於父母奔喪改服毀妝悲不自勝旣殮父母
促女歸女曰此吾家也將焉歸誓自盡乃止夫家
貧勤紡績以佐不給舅遭疾女焚香祝天割股以
進果愈後姑遭疾亦然旣而舅因長子復亾呱呱
一孫感傷成疾遂不起女侍湯藥始終無倦姑年

八十六卒營葬畢促立姪成聚爲夫嗣奠舅姑及夫扃戶投繯卒道光十四年旌

以節者著者

崔氏侯來王妻夫亾撫孤守節五十二年

遂氏喬冲霄妻冲霄死於寇子維嶽繼亾遂與維嶽婦馮氏姑婦同節

盧氏張三遷妻三遷早卒無嗣盧年十七孝事翁姑守節四十餘年

張氏王文泰妻適泰二年泰逝撫孤守節年七十卒

黃氏薛九經妻孀居四十餘年撫孤成立

修武縣志

卷九 列女傳

十一

邱氏路遐齡妻年二十八夫亾毀容誓守艱苦備嘗父憐之購新宅令其移居泣曰吾所居夫死之地也卒不移使子讀書壟側曰使有所感而思奮也守節三十六年康熙四十八年旌

李氏馮鏌妻年十九夫亾家貧紡績爲祖姑及夫營葬夫異母弟甫五歲撫之成立苦節四十年雍正八年旌

趙氏邵光榮妻夫亾家貧茹苦令子建元就外傳登康熙癸巳賢書雍正十一年旌

宋氏范敬所妻年十五于歸夫死欲殉念姑老于幼乃紡績度日卒葬姑教子成立守節四十二年

卒年六十有三

楊氏薛自成妻年十六夫亡苦節六十九年

張氏姜士表妻年十八夫亡無子一姪敦煦又失怙恃氏號痛曰姜氏兩世惟此子遺愛育成立苦節七十四年雍正年旌

宋氏郝景勳妻年二十四夫亡養親訓子年七十四卒

李氏薛振奇妻年十七夫亡孝養翁姑撫育幼子苦節四十二年乾隆八年旌

通志作雍正十二年

劉氏趙瑤妻年二十六夫亡養老撫孤苦節四十九年乾隆九年旌

修武縣志

卷九

列女傳

三

張氏薛守身妻年二十三夫亡無子事姑盡孝姑嘗歎曰孝婦事我誰事孝婦乎撫嗣子守節六十二年乾隆九年旌

姜氏范瑯妻年二十三夫亡撫幼孤苦節六十餘年

王氏崔敦妻年十七夫亡事翁姑撫幼子苦節六十餘年

李氏范廷梅繼室年二十五夫病故遺子數月事姑曲盡孝道姑常語人曰吾有孝婦家之福也子又天取姪羅錦嗣卒年六十四

杜氏王鳳來妻年二十五夫亡事孀姑撫嗣子守

六十七年

任氏范珍繼室年二十二夫亡守節六十一年

李氏范大儒妻年二十四夫亡父母勸其改適慨然自誓終身不歸守節五十年

毛氏劉璽妻年二十四夫亡孝事舅姑撫姪承嗣守節五十一年

喬氏薛夢鑿妻年二十二夫亡子幼鍼黹以教養之年五十三卒

周氏趙之玉妻夫亡養姑撫子守節三十二年

趙氏薛永壽妻年二十三夫亡子幼立志守節舅姑亡營葬如禮守節三十餘年

修武縣志

卷九

列女傳

三

抄氏王宜妻早寡養老撫孤守節四十二年

宋氏范沂妻年二十六夫亡撫育幼子守節三十餘年

馮氏姜暹妻年二十一夫亡葬舅姑撫嗣子守節三十一年

岳氏范廷試妻年二十五夫亡孝事翁姑教育嗣子守節三十年乾隆二十三年旌

李氏陳思智妻年二十八夫亡撫孤成立守節四十年

常氏馬朝亮妻年十九夫亡苦節五十餘年

姬氏王傲妻年十九夫亡家貧無子苦節五十餘年

年

張氏范汝弼妻年十九于歸八載夫亡孝事舅姑年七十四卒

李氏盧永卓妻年二十夫亡事親撫嗣守節三十餘年

石氏張浩妻年十九夫亡親老子幼苦節五十七年

鄭氏蘇生溥妻年二十一夫亡矢志撫孤時值寇亂氏起高樓自衛里中婦女多藉以避難遂名之曰避賊樓守節二十三年

李氏蘇鐸妻年二十八夫亡撫二子成立澹樞三

修武縣志 卷九 列女傳

古

世俱經營殯葬又施地作義冢以埋寇亂遺骸守節六十五年

靳氏陳士毅妻年二十二夫亡奉事姑嫜撫育嗣子守節五十三年

范氏王永章妻年二十九章故遺一子矢志守節孝養衰姑夫兄永光夫婦俱故遺二子安仁利仁

氏撫之如己子二姪相繼亡復撫安仁襁褓遺孤倍加恩育守節三十七年

王氏孫大德妻夫亡子幼守節三十八年

趙氏盧爾吟妻夫亡子幼欲以身殉舅姑止之撫孤成立守節三十七年

岳氏范惕如妻年十九夫亡苦節五十七年

王氏吳玉符妻年二十一夫亡無子姑憐之令改嫁氏翦髮自誓勸翁娶妾生子後遂取妾之子所生者爲嗣苦節六十二年

范氏楊又溥妻年十九于歸七載夫亡遺一子矢志孝衰姑子玠食餼于庠守節三十三年

侯氏趙桂妻年二十七夫亡姑老家貧曲盡孝養撫孤成立苦節三十二年

王氏成奕銘妻年十九歸奕銘十載夫亡無子孝養翁姑守節四十三年

趙氏楊芳瑞妻年十九于歸九載夫亡無子事姑

修武縣志

卷九

列女傳

五

甚孝守節五十三年

邱氏范仲如妻年二十于歸五載夫亡遺子三歲撫之成立守節四十年

荆氏劉珍妻年二十五夫亡惇獨無子苦節四十八年

王氏薛永在妻年二十五夫亡二子俱幼守節四十餘年

龐氏薛永澤妻年二十五夫亡葬親撫孤守節四十六年

趙氏趙萬妻年十九于歸十載夫亡事姑撫子曲盡其道子媳俱亡復撫遺孫苦節五十一年

馬氏成士林妻年二十四夫亡無子苦節四十餘年

張氏詹豫妻年十七于歸九年夫亡紡績度日孝事翁姑撫養二子

張氏秦瓚妻年十八于歸夫故三月生一子事衰姑育孤子孝慈兼盡

王氏楊萊仙妻年十八夫亡孝事翁姑苦節四十餘年

王氏薛沈妻年二十二夫亡事翁姑撫幼子守節終身雍正年旌

原氏范生秀妻七載夫亡守節

修武縣志

卷九

列女傳

十六

何氏邱紹孔妻年二十三夫故無子事舅姑以孝聞

袁氏劉爾全妻夫亡親老子幼食貧矢志守節終身

王氏范鴻印妻年二十一夫亡事祖姑與姑以孝聞撫嗣子守節終身

王氏姬越妻適越未一歲夫亡守節四十五年

范氏姬大儒妻年二十夫亡守節三十三年

王氏母中宰妻夫亡事姑撫子備歷艱辛守節三十二年

薛氏姬銑妻年二十二夫亡力貧度日族黨周之

亦不受苦節四十三年

胡氏劉雨妻年十九夫亾苦節四十三年

張氏程泮妻年二十四夫亾撫孤守節以終

李氏薛繼傳妻夫亾守節

蔣氏張光翰妻夫亾守節

王氏薛維勳妻夫亾守節 以上吳志

王氏傅文鶴妻夫早死撫遺腹子景伯娶史氏既而王與景伯相繼歿史亦以節義自矢立族子建中承嗣孝於史氏又念其伯祖文鳳及薛氏苦節無後爲立族子景凝以嗣時稱一門三節婦一孝子云

修武縣志

卷九

列女傳

七

范氏路由正妻年二十二夫病劇與訣曰吾病不起母老無依曾祖及祖父柩俱未葬諸子年幼汝勉爲之遂卒氏不負所託守節五十年

和氏趙良相妻年二十一夫亾孝慈兼盡守節五十一年

毛氏夏百福妻于歸二年夫亾撫子成立守節五十餘年

范氏楊希賢妻夫亾撫遺孤及孤姪皆成立守節三十餘年

崔氏薛琬妻年二十夫亾孝事翁姑撫子成立守節五十八年

盧氏薛體玉妻年二十夫亡矢志守節撫孤後以翁姑相繼歿哭泣而死

董氏劉士庚妻年二十七夫亡事翁姑撫幼子苦節三十六年

馬氏范永康妻年二十九夫亡甘貧守節孝養翁姑

王氏范更妻夫亡守節

以上府志

朱氏金湘妻年二十四夫亡撫遺子成立守節三十三年乾隆三十九年旌

范氏連添位妻年二十夫亡家貧子幼翁勸改適氏涕泣誓守翁病廢親奉湯藥及歿營葬盡禮撫

修武縣志

卷九

列女傳

六

孤成立嘉慶十三年旌

崔氏原廷相妻年二十七夫亡自縊家人救之得免子七歲復夭以舅姑年老相對不敢涕泣取姪恭爲嗣守節四十八年道光元年旌

趙氏原廷用妻年二十四夫疾革與訣曰家貧子幼親或失養吾死不瞑目氏泣矢不負夫卒屏簪珥與寡嫂崔晝夜紡織隆冬指裂不稍怠自咽糟糠而舅姑甘旨無缺凡三十年子惠以病廢讀變產爲孫天錫延師卒食餼貢成均臨終召子孫屬曰讀書人須安貧守命汝父子卽餓死切不可爲非守節五十年道光元年旌

常氏原恭妻年二十九夫亡欲殉以孀姑在堂而止姑崔叔姑趙皆以節著氏克盡婦道足不出門教三子成立守節四十三年人稱原氏一門三節道光元年旌

劉氏監生李維新妻年十九于歸夫患末疾侍奉無閒二十八歲夫亡無子因翁精力尚健勸娶妾王氏生子維祺而王卒氏服藥下乳哺養成人翁又得末疾湯藥親嘗取維祺子旺嗣守節四十二年道光元年旌

王氏杜聚山妻年十九于歸夫抱沈疴侍湯藥越二十九日夫亡事舅姑孝謹撫夫幼弟敬孔成立

修武縣志

卷九 列女傳

九

生子璽取爲嗣守節四十九年道光二年旌

謝氏杜敬宗妻年二十八夫亡孝養翁姑喪葬如禮取堂姪旺爲嗣訓以義方守節三十五年道光二年旌

抄氏趙廷振妻年二十二夫亡勤紡績以養親嚴義方以訓子年三十六卒道光二年旌

胡氏生員薛明德妻年二十夫亡家貧紡績以養翁姑夫弟幼翁姑相繼歿氏竭力營葬夫弟生子女各四而媳亡氏撫養成立取其長子東洋爲嗣守節五十五年道光二年旌

宋氏薛敬修妻年二十六夫亡舅姑又病撫二子

孝養不衰舅姑相繼歿祖姑節孝龐氏亦尙淹柩
俱營葬如禮遺小姑七齡撫養遣嫁道光十二年
旌守節已五十四年

許氏梁兆鯤妻年二十一夫亾姑病衣不解帶者
三月餘嘗焚香夜祝願以身代舅繼娶崔氏氏事
之如姑性不私己物凡貧婦無衣者輒推解之延
師課子模嘗雪夜撫之泣曰爾形單影隻吾所以
日夜焦勞者冀汝有成耳模登道光壬辰賢書道
光十三年旌守節已五十餘年

范氏鄭方妻年二十二夫亾孝事翁姑訓子勵修
以義方守節五十二年道光十四年旌

修武縣志

卷九 列女傳

三

范氏鄭勵修妻年二十七夫亾欲殉姑范急止之
逾兩月生子而殤與孀姑相依爲命取姪珏嗣珏
太學生孫本清貢生一清庠生人謂雙節之報守
節四十六年道光十四年旌以上俱建專坊

侯氏范坤如妻年十九于歸七載夫亾子西鑑甫
三歲氏撫育成立年八十二卒

徐氏范西鑑繼室年二十一于歸結縭四載夫亾
無子取族子仲文嗣時孀姑侯年已七旬氏事姑
撫子孝慈兼盡卒年七十七

王氏范仲元妻年二十一于歸結縭九載生子佩
蓮佩蘭皆幼而仲元卒姑許與氏撫育之佩蓮由

虞生入貢至道光十三年守節已五十三年三世苦節

李氏監生路天錦妻生子莖甫周歲而夫歿氏方三十矢志守貞事孀姑撫幼子家素封里黨有婚葬不給者周濟不吝卒年七十八

王氏監生路莖妻年十七于歸孀姑李有末疾奉事不懈能得歡心二十九歲夫亡撫幼子達善充乾隆己酉科拔貢生卒年七十七

和氏監生路莖側室年二十三莖故孀姑李嫡婦王二人素多疾氏奉侍二十餘年不懈視嫡子達善曲加慈愛卒年六十五

修武縣志

卷九

列女傳

三

姜氏李宗文妻年二十三夫亡紡績度日上事翁姑下撫幼子卒年九十二

李氏生員王精一妻年二十九夫亡養姑撫幼備極艱辛子孫繁衍稱名門焉卒年八十七

薛氏姜元學妻年二十五夫亡家極貧姑老而多病紡績以供甘旨姑歿號泣欲殉三年內哀至則哭鄰里稱賢卒年七十七

袁氏都靜庵妻通孝經年二十夫亡長幼十餘口皆死於疫氏撫一姪一女愛養備至皆得成立卒年七十三

李氏生員范六庚妻年二十五夫亡家貧子幼紡

績以養舅姑喪葬如禮撫子成立卒年六十六
楊氏儒童薛永琇妻年二十三夫亾子顯甫三歲
姑年七十病末疾侍養五年不倦教子力學孫淮
清入庠食餼卒年六十
許氏儒童王鵬雲妻年二十四夫亾無子取堂姪
會魁爲嗣姑素患心病氏扶持二十年營葬如禮
卒年六十七

沈氏王利仁妻生而穎慧父教以列女傳及女箴
皆成誦于歸二載年二十一夫亾旣葬扃戶投繯
救之越兩時蘇泣謂姑曰兒得死所救兒何爲姑
亦泣曰獨不念吾二老邪氏乃誓守養親紡績以

修武縣志

卷九

列女傳

三

佐甘旨不出戶庭者二十餘年及舅姑相繼歿葬
之夕氏無疾而卒先是氏爲舅姑治喪具復自備
一棺及卒啟棺殮之內設白衣一襲殆以昭其潔
云年四十七

趙氏武紹祖妻年二十四夫亾無子取姪爲嗣奉
衰姑孝養無缺營葬如禮卒年五十七

張氏范鴻秀妻年二十八夫亾鴻秀貧不能讀氏
身任家務勤績以佐之鴻秀以屢困場屋發憤卒
氏泣曰余姑守節四十餘年取余夫承嗣今死而
嗣不立負夫且負姑乃取堂姪清芝爲嗣仍以績
課讀卒年七十八

趙氏都秉乾妻年二十夫亡孀姑痛甚氏承顏歡慰背面灑淚不使姑知嗣族子已授室子媳又相繼亡復取嗣子胞姪重光爲嗣延師課讀入庠卒年八十四

趙氏呂振祥妻年二十一夫亡家貧紡績以奉翁姑有疾湯藥親嘗及歿喪葬如禮撫夫幼第二人爲仲娶妻生子以懷義爲嗣卒年七十四

王氏劉殿卿妻年二十二夫亡無子取夫兄長子撫養無異己出及病篤仍以長子歸夫兄取次子爲嗣卒年六十三

趙氏邱乃岱妻年三十夫亡無子取從弟子爲嗣事孀姑撫嗣子至八十三歲親見曾孫受室

趙氏范崑繼室年二十二夫亡號泣不食繼念翁姑在堂遺孤甫周歲彊起任事孝慈兼至卒年八十六

趙氏杜君佐妻年二十二夫亡逾三月生一子苦節撫之成立卒年七十二

趙氏薛泰臨繼室年二十七夫亡舅患末疾姑年衰奉養不懈撫夫前室子銑及己子鈞嚴慈並用銑增生鈞庠生卒年六十七

張氏林應海妻年二十三夫亡舅姑未葬氏舉三棺營葬北原家貧不能自活依母家以居取堂姪

文元嗣卒年八十三

王氏馬永敏妻年二十三夫亡遺孤月餘家甚貧撫之成立卒年七十一

薛氏王若楷妻年二十九夫亡無子取姪灼嗣事舅姑撫嗣子孝慈備至卒年七十一

鄭氏逢芳型妻年二十三夫亡家貧奉養翁姑無缺甘旨無子取姪長庚嗣卒年五十九

張氏焦方妻年二十一夫亡孝事孀姑延師教子玉書讀夫伯兄無子氏慨然曰玉書雖孤子大宗不可絕也命承嗣焉卒年七十九

張氏司元鼈妻年二十六夫亡孝事舅姑營葬如

修武縣志

卷九

列女傳

十四

禮卒年七十五

李氏王名鼈妻年二十九夫亡以紡績事衰姑撫孤成立家漸豐裕卒年八十四

王氏李延備妻年二十六夫亡孝事舅姑舅歿奉孀姑二十餘年無倦無子取堂姪明誠嗣教養成立卒年六十八

司氏貢生范齊賢繼室幼通孝經大義年二十三夫亡事衰姑飲食必手自烹調姑曰僕妾多矣何自苦如此氏曰恐若輩所作不適母口姑病湯藥必親嘗撫養二子韶光予壽成立予壽業武入庠卒年七十一

周氏劉振德妻年三十夫以穿井墜石殞氏痛不欲生念夫無子取夫弟振全子康元嗣撫養成立卒年七十六

郭氏劉康元妻年二十五夫療疾亡念孀姑周氏無人奉養朝夕承歡取夫堂兄福元子世喜爲嗣姑婦相依爲命卒年五十八

趙氏吳相升妻性貞靜聞談節義事輒流涕感歎年二十七夫亡無子父母諷以他適泣曰翁姑在堂而相棄如亡夫何乃毀容自矢卒年七十八

賀氏庠生李嫺斌妻年二十八夫亡一子甫三歲善事孀姑趨承無閒姑語人曰有婦如此雖吾子

修武縣志

卷九

列女傳

五

在不是過也姑病湯藥親嘗姑歿悲痛不食飲者數日因念藐孤無託勉進飲食卒年七十一

申氏生員王履謙妻年三十夫亡遺孤四人撫養成立卒年七十二

欽氏王錫爵妻年二十六夫亡翁年六十餘翁弟永安亦早逝無子氏鬻簪珥爲翁納妾果生子錫玉氏取其子文遠爲嗣卒年六十七

荆氏薛榮妻年二十二夫亡孝事翁姑撫育幼子鄉里賢之卒年五十六

秦氏王家祥妻年二十三夫亡無子典簪珥爲翁娶妾生子家蘭翁歿妾改適氏撫家蘭成立歲荒

糟糠自饜夫堂弟家瑞歿氏復招其妻子同居家
蘭生子氏取爲嗣兩門賴以不墜卒年七十七
成氏吳汝霖妻年二十七夫亾無子翁妾生子運
昌甫周歲翁卒姑老氏撫養成立卒年五十三
李氏史昭直妻年二十八夫病侍湯藥衣不解帶
竟不起氏欲身殉念己無所出乃取夫弟子九經
承嗣卒年六十六

毋氏王振統妻年二十三夫亾子鏞甫四歲氏事
翁姑撫弱息孝慈備至視子入庠卒年六十六
謝氏薛承珪妻年二十三夫亾家極貧紡績以養
翁姑取姪爲嗣卒年五十七

修武縣志

卷九

列女傳

三

馮氏王大本妻年二十一夫亾家貧翁以慟子得
瘋症不省人事出入無時氏扶持不離親奉湯藥
二十年延師訓子承基外睦親鄰慷慨好施終致
家漸豐裕卒年七十八

李氏丁國柱妻年二十五夫亾家極貧姑年老遺
孤三人皆幼氏傭賃以養姑且鬻其子旣而姑得
末疾氏不能出傭負姑行乞會大雪姑不得食氏
剪髮易米於富室富室哀之與米卻髮姑卒鄉里
助以棺木殯葬盡禮卒年七十六

員氏馮琳繼室年二十四夫亾夫前妻李遺子士
秀氏愛如己出夫卒欲以身殉嫂氏勸之勉進飲

食事翁姑盡禮卒年六十七

李氏吳興紹妻年二十九夫亾勤績以奉雙親撫
二子常苦飢寒矢志自守舅姑歿殯殮盡禮卒年
七十七

姜氏庠生成芬妻年二十八夫亾家貧甚乾隆五
十年歲大禮采草木之實以細者奉孀姑麤者自
食夫有二弟皆無子氏勸仲氏芳買婢朱氏值年
荒芳將鬻之氏不可鬻田及紡績所得俾芳經營
後朱氏得二子乃爲夫立後卒年六十三
王氏監生杜全妻年二十六夫亾上事翁姑撫弱
叔幼子咸克成立卒年七十二

修武縣志

卷九

列女傳

三

趙氏范金堂妻年二十二夫亾事翁姑撫幼叔勤
紡績足不出戶庭者三十年卒年五十四

劉氏王履平妻年二十三夫亾子延秀甫八月事
舅姑撫幼子處娣姒能以禮讓卒年五十九

薛氏董松妻年二十二夫亾孝奉翁姑撫弱子元
章成立卒年六十二

杜氏武生張會妻年二十六夫亾孝事翁姑無子
取姪燦嗣卒年六十五

蔣氏盧千書妻年二十于歸七月夫亾欲殉三日
不食翁姑勸之乃止姑王得痿疾氏扶持不倦和
睦妯娌喪葬如禮取姪淳夫嗣廩膳生卒年五十

王氏姬懷聚妻年十九夫亡欲殉因舅姑年老而止取伯氏子爲嗣子婦又相繼亡撫孤孫成立卒年七十

秦氏王德寶妻年二十夫亡上事舅姑及歿殯殮如禮取姪爲嗣撫養成立卒年六十

趙氏王克儒妻年二十七夫亡紡績以供舅姑甘旨年俱八旬而歿訓子以義方卒年七十

張氏王御臣妻年二十四夫亡舅精一姑卽節婦李氏侍奉過於他姒姑病親嘗湯藥衣不解帶者數月撫孤成立致家漸豐裕卒年六十

修武縣志

卷九 列女傳

三

朱氏王士榮妻年二十五夫亡日夜紡績以養舅姑延師訓子應昌入庠卒年六十

康氏王振榮妻年二十六夫亡家貧甚傭於人澣衣縫裳以養翁姑撫幼子焉卒年六十五

徐氏薛世珩繼室幼通女箴年二十二夫亡奉舅姑撫弱息生養死葬子女有成卒年四十六

范氏馮繼富妻年二十七夫亡善事舅姑無子取姪爲嗣卒年五十七

金氏李基妻年二十五夫亡姑老多病氏扶掖而行翁姑歿有二女皆貧氏不時周恤曰我未能久事翁姑體翁姑之心以慰九原而已鄉鄰有急施

貸不吝嘗買密縣趙氏女爲婢詢知其家已字人
呈縣牒取女翁陰有才來氏爲製妝奩送女完聚
卒年六十五

趙氏許奉璋妻年二十夫亾姑因痛子得不語症
氏敬進飲食曲體親心者二十餘年訓課子灝甚
嚴姑臨歿屬稍寬之後入庠食餼氏因其姑之未
及見也常悲痛焉卒年四十七

王氏秦士通妻年二十三夫亾孝事孀姑撫姪凌
雲爲嗣卒年五十二

張氏王允升妻年二十三夫亾兼遭翁姑喪殯葬
如禮卒年四十九

修武縣志

卷九 列女傳

完

岳氏方立保妻年二十八夫亾氏母家貧幼卽童
養於方氏立保以木工爲業氏佐以紡織甘旨無
缺夫歿後氏一身任之翁又歿氏大慟絕而復甦
事孀姑益謹雖貧不失養未幾氏卒家大窘姑語
人曰使婦在吾何至是氏卒年三十九

馬氏秦天敘妻年十八夫亾越三月生子茂林事
親撫孤孝慈兼至卒年三十八

姜氏范椿齡妻年十九夫亾生遺腹子崑上盡孝
養下撫遺孤卒年三十九

馮氏秦士讓妻年十七于歸半載夫亾矢志守節
卒年二十六

以上道光十三年稟
請總坊已故節婦

范氏樊士英妻年二十二夫亾上事舅姑下撫幼子守節已六十八年

姬氏杜月妻年二十三夫亾事翁姑能得歡心撫幼子教以勤儉子又蚤亾遺二孫撫之成人守節已六十一年

李氏姜士傑妻年二十夫亾舅姑未葬取堂姪季豐爲嗣延師訓誨捐貲入成均中年又歿氏營葬四棺撫幼孫功懋成立孫曾繞刼守節已六十一年

鄭氏監生馮三樂妻年二十八夫亾事翁姑孝謹撫幼子成立守節已五十五年

修武縣志

卷九 列女傳

三

傅氏薛清祥妻生而聰慧知禮義于歸時翁姑皆歿春秋祭祀常語人曰翁姑棄世已久欲盡孝不可得也年二十六夫亾無子一夫弟尙幼勤績以佐饗飧撫之成立守節已五十六年

杜氏姬恆達妻年二十九夫亾家貧夫承嗣叔父氏勤績以事舅姑舅姑不覺其爲嗣子婦也子二長入庠次納粟入監守節已五十年

都氏柴儒妻年二十五夫亾幾死者再因舅姑年老代夫奉養克盡子職取姪振昇嗣守節已五十四年

高氏王士妻于歸未數月翁姑相繼歿家貧隨夫

佃田於富室年二十四夫又歿無子取伯兄次子
國惠嗣氏勤績子力耕致家稍裕後伯兄家中落
終日不能具一餐氏命子迎養之曰不可令其薄
於所生也守節已五十四年

王氏姬百貞妻年二十三夫亡家無儋石資十指
以養老撫幼舅姑歿竭力營葬如禮守節已五十
四年

郭氏于萬妻年二十六夫亡子成道甫三歲撫之
成立成道又故撫幼孫守德以至受室守節已五
十一年

李氏邱廷獻妻于歸後姑亡遺子女各一皆幼氏

修武縣志

卷九 列女傳

曲加撫養年三十夫亡無子奉衰舅婦兼子道爲
夫弟娶妻生子渠取爲嗣入庠食餼守節已四十
六年

王氏范清懋妻年二十一夫亡遺腹子文潤上有
祖姑暨翁姑皆年老氏紡績以奉甘旨殯葬盡禮
孫曾繞膝皆稟氏命而行守節已五十四年

韓氏薛承業妻年二十五夫亡養老撫幼孝慈兼
盡守節已四十九年

趙氏盧位西妻年二十一夫亡事舅姑以孝聞事
夫兄位北及嫂董氏如舅姑位北一子復全氏撫
之過於所生夫歿依兄嫂以居後位北夫婦俱歿

氏經紀其喪及夫柩俱歸窀穸取復全次子凌漢
爲孫守節已五十二年

王氏范承灼妻于歸後夫得癩病奉事惟謹二十
八歲夫亡無子夫兄承煇一子福元父子相繼逝
承焯亦得末疾氏憂思雙目失明急爲福元立嗣
復取堂姪予平爲夫嗣守節已四十四年

王氏張會魁妻年二十五夫亡夫兄弟四人三人
出嗣氏事舅姑養老送終皆克循禮子熙早卒撫
孫逢午成立守節已四十八年

王氏趙良翰妻年二十八夫亡事孀姑以孝稱取
姪壽元嗣守節已四十二年

修武縣志

卷九 列女傳

三

張氏韓德志妻年二十八夫亡養老慈幼克盡婦
道守節已四十二年

范氏趙元會繼室年二十三于歸夫已膺疾奉湯
藥閱二十餘日夫亡翁姑年老前妻子甫十歲氏
矢志不二翁姑歿子又早亡撫遺孫三人成立守
節已四十七年

張氏姬懷臣妻年二十九夫亡家貧子幼拮据以
養舅姑及歿營葬如禮守節已四十年

李氏秦大受妻年二十四夫亡事翁姑克盡婦道
無子以姪士通嗣守節已四十四年

王氏趙元奎妻年十八夫亡無子事翁姑以孝聞

翁歿姑寢疾奉湯藥衣不解帶者兼旬撫嗣子長祿成立守節已四十九年

王氏薛天奎妻年二十一夫亾氏縊以殉姑救之得免取夫弟天行子爲嗣姑歿哀毀盡禮待僕婢有恩守節已四十五年

宋氏李建寅妻年二十二夫亾無子事舅姑供養必豐勤績以佐匱喪葬如禮守節已四十四年

韓氏許元黑妻年二十九夫亾孝事翁姑和協妯娌以賢稱家貧依母家以居無子取夫弟之子爲嗣守節已三十八年

趙氏王來富妻年二十二夫亾孝事翁姑子路比

修武縣志

卷九

列女傳

三

長恪守母訓守節已四十二年

蔣氏薛再彪妻年二十五夫亾家無恆產以紡績奉翁姑姑得末疾侍湯藥日久不倦及歿營葬盡禮子女各一撫之成立守節已三十九年

姬氏程振甲妻年二十九夫亾事翁姑盡孝撫兒女成立女亦少寡稟承母訓亦以節聞守節已三十六年

李氏路文聚妻年二十四夫亾敬事孀姑十餘年如一日無子以姪雲上嗣勤績以資課讀得入庠守節已四十年

都氏楊鴻麟妻年二十夫亾自甘勤苦而舅姑衣

食務適口體乾隆五十九年沁河決邨適當衝倉卒不暇顧幼子急扶舅姑避水鄰邨頃之水中涌一物至撈之其幼子也人以為孝德所感云守節已四十三年

李氏楊三重妻年二十一夫亾姑先歿勸翁繼娶蕭氏執婦道惟謹撫子福祥守節已四十二年

范氏王彩章妻年二十八夫亾家甚貧朝夕紡績翁姑未嘗失養子先魁甫四月撫之成人守節已三十四年

趙氏張原淑妻年二十九夫亾翁姑多病舉動需人氏躬自奉事不累娣姒事死如生無子取姪連

修武縣志

卷九 列女傳

三

成嗣守節已三十三年

欽氏盧運豐妻年二十九夫亾姑為繼室氏竭力事舅姑者十餘年無子以姪光斗嗣已娶妻乃相繼逝零丁孤苦恪守清操已三十三年

李氏王成道妻年二十七夫亾遺子守德甫周歲事孀姑撫弱子守節已三十五年

盧氏生員王履端妾性貞慧事嫡如姑年二十五夫與嫡相繼歿無子取堂姪延儒為嗣延儒貧不能自給氏分贍田一半與之食貧無怨守節已三十六年

崔氏張秉正妻年二十一夫亾無子取姪次子國

俊爲嗣孝事孀姑姑病侍湯藥衣不解帶者數月
守節已四十年

范氏柳元鼎妻年二十八夫亡事親能得懽心事
必稟姑而後行撫二子守節已三十三年

王氏監生徐榜鼈妻年二十七夫亡舅姑已老氏
雖哀毀翁姑前必愉色婉容子岐年幼教以義方
值歲饑出餘粟以振貧乏有婚葬不給者無不量
力資之守節已三十二年

宋氏張文傑妻年二十五夫亡常在暗室飲泣於
翁姑前終無戚容守節已三十一年

韓氏李久安妻年二十夫亡孝養翁姑三十餘年
無子取堂姪爲嗣守節已三十四年

田氏監生趙錕繼室年二十二夫亡姑逾八旬祖
翁姑均尚未葬前室子芳甫三歲氏欲自殉姑撫
之曰吾年邁又三世止此子汝死仰事俯育何賴
焉氏遵姑命姑歿三世窀穸賴氏經營撫子芳業
武入庠守節已三十二年

趙氏楊彥妻年二十一夫亡孝事翁姑取堂姪侄
成爲嗣性慷慨好施有貧不能舉火者無不量力
周之守節已三十二年

許氏姬樂友妻年二十夫亡無子慟不欲生舅姑
撫之曰吾已逾七旬汝死吾何賴焉氏收淚誓守

孝事舅姑守節已三十二年

范氏李沖霄繼室年十九于歸三月夫歿欲自殉姑慰之曰吾年老前室遺孤又幼獨不爲吾老幼計乎乃止姑得末疾侍湯藥衣不解帶者年餘姑歿撫孤守節已三十三年

梁氏兩廣鹽運使趙三元側室甫入門嫡杜氏患痰迷疾目失明氏嘗藥餌進衣食如孝子之事親十餘年不懈嫡孫翼仲失母氏撫育之辛勤備至食餼後猶依氏如慈母焉守節已二十二年

王氏杜維屏妻年二十夫亡孝事孀姑每事必體姑意而行遺孤一人盡貨妝奩以佐讀守節已三

修武縣志

卷九 列女傳

三

十二年

以上道光十三年稟請總坊生存節婦

范氏吳厚妻年二十五夫亡孝事孀姑自擁敗絮咽糟糠取堂姪洛爲嗣生子運庚而夫婦相繼卒氏撫遺孫成立

張氏王廷舉妻年二十九夫亡事兩代孀姑曲盡婦道夫翁瑞四幼氏撫之入庠年五十四卒

李氏崔膺元妻年十六于歸六年夫亡有遺腹數月生子金山奉七十老姑育孤兒好善樂施捐給鄰寺良田十畝以供香火年七十七卒子金山娶妻陳氏年二十七夫亡遺二子廷柱廷玉陳矢志守節事姑育子年七十一卒廷玉娶妻李氏于歸

八載夫亡遺一女方四歲時祖姑李已七旬姑陳亦五十餘李竭盡心力事老撫幼後女亦天取姪承嗣年四十六卒里人以一門三節稱之

范氏王溫妻系出名門年二十九夫亡家貧親老日夜紡績事翁姑撫幼子視孫道恆入庠守節五
十一年卒

謝氏王希哲繼室乾隆十七年年十八于歸前室子泮文甫三歲氏奉舅姑御家人上下無閒言四載夫歿氏銜悲持戶積勞成疾越五年卒

董氏范宏林妻年二十二夫亡家極貧又值歲歉日夜操作以養親撫子翁姑歿營葬盡哀守節五
修武縣志 卷九 列女傳 七

十餘年卒

丁氏董世旺妻年二十四夫亡事衰姑撫弱子守節四十餘年卒

鄧氏王聚昌妻年二十二夫亡翁姑已衰子文升僅八月氏撫之成立守節三十餘年

李氏生員趙旺妻年二十一夫亡子無偏未周歲氏奉翁姑撫幼子守節三十三年

常氏監生馮宜城妻年三十夫亡舅姑未葬祖姑在堂氏奉養無缺祖姑歿舉四棺營葬盡禮取姪繼先爲嗣與媳又相繼早逝撫幼孫鶴齡守節四
十八年

史氏王敦妻年二十五夫亡無子夫弟妹皆幼氏撫養勤勞翁鰥而多病繼娶張氏氏待之維謹未幾翁與夫弟皆歿姑媳熒熒相依竭力營四殯取堂姪華山爲夫嗣又取恆山爲夫弟嗣皆撫之成立守節十八年卒

祁氏陳永福妻年二十九夫亡教子法儒以耕讀守節三十一年卒

秦氏朱克明妻年二十七夫亡無子取姪爲嗣甫生子而亡翁年老足不良於行賴氏扶持翁姑歿營葬如禮守節四十六年卒

史氏楊喜冬妻年二十五夫亡子復性幼撫之成立楊氏五世一堂義不分釁氏孝敬舅姑和睦娣姒從無閒言守節二十六年卒

抄氏楊金銘妻年二十五夫亡哭死數次翁疾奉湯藥數月不懈姑趙氏衰晝則侍食夜則同寢每一念夫淚如雨下見姑至輒收淚變戚爲懽以堂姪復初嗣守節二十一年卒

王氏韓親賢繼室年二十一夫亡守節二十七年卒

韓氏范世學妻年二十夫亡守節三十二年

張氏原芳蘭妻年二十六夫亡守節二十五年

徐氏成鵬兆妻年二十一夫亡家貧無子紡績以

養舅姑歿後殯葬如禮立支子爲嗣嘗刺繡一幅題詩於上以自誓云真節立志孤苦零丁哀鴻失侶枯枝長青雙手拮据幽香自馨天日上鑒存順歿寧守節五十四年卒

趙氏閻若岱妻年二十三夫亾事舅姑撫幼子守節五十八年卒

張氏范宏緒妻年十九夫亾子方二歲翁柩在殯氏竭力營葬孀姑失明事之十年撫幼子成立守節三十四年卒

王氏馬秀妻年二十二夫亾子朝璽幼事翁姑以孝撫子守節五十八年卒

修武縣志

卷九

列女傳

三

孫氏龐玉琳妻年二十三夫亾事翁姑撫幼子守節四十七年卒

姜氏馬朝龍妻年二十七夫亾無子孝事舅姑守節五十年卒

張氏霍樹妻年二十夫亾子峯烜僅月餘族人欲奪而嫁之氏以死自誓免峯烜入賞選膚施縣尉氏隨任十八年峯烜遭疾卒氏亦尋卒守節五十五年

婁氏趙德成側室年二十二德成故子文士甫三歲竭力營葬翁姑夫主嫡妻四喪守節四十六年卒

張氏增生王欽賜繼室乾隆六十年年十九于歸
前室子漢卓甫五歲撫之有恩復生子漢傑結縭
六載夫歿氏撫二子一女勤劬倍至漢卓食餼漢
傑亦成立守節二十九年

王氏蔣紹孔妻乾隆四十九年于歸結縭十載夫
歿子鈞甫五歲撫養成立道光十年卒

張氏監生王輔吉側室氏無出次妾生子成兒未
逾月而次妾卒輔吉亦卒氏曰吾姑與嫡皆老矣
此呱呱者予之責也懷抱哺養視猶已出兒長成
不知非其生母也守節二十餘年卒

韓氏焦自林妻年十九于歸二年夫亡柏舟自誓

修武縣志

卷九 列女傳

罕

年六十六卒

薛氏李愔繼室年十八于歸夫亡無子取姪學忠
爲嗣紡織撫養成人年七十五卒邑令旌其門

李氏王力能妻夫亡守節四十九年卒

李氏秦生祿妻年二十五夫亡親老子幼紡績以
事舅姑撫孫九嶷入庠

孫氏王家珩妻年十九夫亡事兩代孀姑生養死
葬盡孝盡哀夫姑范王氏青年守節無力表揚氏
呈請邑令給扁遺腹子承先貢入成均早卒

徐氏張適妻系出名門年二十七夫亡姑老子幼
俯仰維艱氏孝慈兼備子念修太學生孫原濮邑

庠生

趙氏生員龐居奎妻年十九夫亡越六月生于元
兒氏勤績奉翁姑撫幼子守節已三十七年

史氏楊喜冬妻年二十六夫亡子復性甫周歲撫
之成立守節二十六年

甯氏監生都應選妻年二十三于歸半載夫亡奉
翁姑十六載孝養無缺取姪尙志爲嗣

范氏詹國全妻于歸七載夫亡事舅姑撫幼子視
孫魁業武入庠

龐氏范思學妻年二十四夫亡舅姑已老夫弟尙
幼氏勤紡績以佐不給困苦有不堪言者親歿營

修武縣志

卷九

列女傳

望

葬如禮取堂姪耘忠爲嗣

王氏劉殿傑妻年二十六夫亡無子奉養翁姑深
得婦道守節已四十三年

程氏盧鴻義妻年二十夫亡欲自盡翁姑勸諭之
乃止翁姑病侍奉湯藥衣不解帶既歿伯兄憐氏

無依勸之改適氏對天焚香截三指以誓不二未
幾伯兄夫婦相繼歿遺孤甫十歲氏撫如己出守

節已三十年

唐氏馬振文妻年二十二夫亡矢志守節已四十
三年

李氏生員吳濬側室年二十四濬故生子運昌甫

周歲氏矢志撫孤守節已五十一年

申氏史闈妻嘉慶七年于歸年十八五世一堂氏能宜其室家結縈九載夫歿子有學甫周歲氏孝事二親爲有學延師訓迪入庠守節已二十八年葛氏史昌庚妻嘉慶七年于歸年十五孝事繼姑雖當盛怒之時未嘗不笑言以進退無怨言結縈十載夫歿無子取姪獻可嗣守節已二十七年

劉氏董宗諒妻年二十一夫亾孝姑嫜和娣姒不苟言笑鄉黨稱其賢守節已二十五年

王氏都應試繼室二十三歲于歸越六載夫亾訓迪所生二子培堂以業武入庠尙文亦納粟入監

修武縣志

卷九

列女傳

三

嘉慶二十四年四十九歲卒

張氏增生楊朝清妻事姑至孝扇枕溫衾二十餘年不懈姑疾衣不解帶者幾兩月及沒恆哀思垂淚終身不已通四子書講義紡績之餘輒以課子姪每教子敏書曰買田一頃不如讀書一冊鄰里賢之

以上皆係采訪節孝

割股附

范氏侯毓魯妻翁病割股療之邑令旌其門

李氏吳周聚妻翁病禱天願以身代復割股爲藥以進病旋愈眾欲鳴於官氏曰吾爲此非沽名也周聚亦力止之乃罷

李氏王廷貴妻夫瞽而翁病篤氏計無所出因割
股肉以療翁人歎美之

范氏薛敏敦妻翁得沈疴氏焚香禱祝割股以進
疾果瘳咸謂誠孝所感

李氏趙廣居妻翁病篤割股療之果愈

楊氏王永祺妻翁病割股以進病果愈夫故守節
三十八年

杭氏張標妻姑早逝翁患沈疴氏焚香祝天割股
以進遂愈翁年八十七卒氏夫已歿氏營葬盡禮
鄉里賢之

董氏馮發財妻事翁姑有孝行翁年八十餘病危

修武縣志

卷九

列女傳

三

醫藥罔效氏割左股烹湯以進病尋愈以上割股療翁

王氏姜天順妻事姑純孝姑病割股療之旌表

王氏薛國綱妻家貧姑病割股和藥以進旌表

劉氏牛超妻姑病祈以身代復割股以進遂愈妾

王氏生二子撫如己出夫故諭妾改適妾亦誓守

公舉旌獎

薛氏梁用正妻割股療姑邑令旌其門

劉氏馬士彥妻姑病醫藥罔效氏聞割股可以愈

疾焚香祝天是夜姑夢人進食未入口香氣遠聞

及旦氏以羹進姑曰是即夢中味也食之愈

馬氏范致妻姑病篤割股以進病旋愈復歷二載

至氏割股之日而卒人以爲孝感所致
史氏薛廉妻姑疾割股煎湯以進遂愈
薛氏成奕鑑妻姑病醫藥不效氏割股煎湯以進
病良已

王氏王順臣妻夫兄弟三人析居氏勸夫以美田
讓兩兄及兄業中落仍迎歸養之翁早歿姑七十
一歲多病氏奉湯藥穢褻器必親自滌拭已垂危
割股爲羹以進遂愈

張氏翟玉美妻能盡孝道得翁姑懽心姑病朝夕
祈禱不愈夜焚香割股以進病果痊

李氏薛太恆妻姑病服藥不效割股愈之後姑見
修武縣志 卷九 列女傳 器

氏割處詢之隱而不言其誠以盡孝如此

趙氏王三元妻年十七于歸五載夫亾遺孤方七
日矢志守節姑病氏焚香默祝割左股煎湯以進
病尋愈現年四十鄰里稱其賢

杜氏吳元昇側室事舅姑孝姑病割股以進果漸
愈鄰里賢之以上割股療姑

喬氏李宗義妻夫病割股療之病愈
劉氏張瑾妻夫病篤割股和藥以進尋愈以上割股療夫

吳氏姜最妻父病割股以進病痊割股療父

裴氏朱大千妻祖姑年逾八旬不離牀褥一飲一
飯氏供奉惟謹夫尙未有子病驟作甚劇氏焚香

祝神願以身代謂與其夫亾而身存無益何如身
亾而夫在有賴如是者三夫果愈演劇酬神妹適
馬氏睨氏面忽有寒色問曰媵有恙乎曰無妹急
呼兄來視氏已僵臥牀上片刻氣絕蓋夫愈面氏
實代之矣大千繼娶李氏生子四孫五有身遊蠻
序者以身代夫

藝文志

昔班孟堅漢書十志特擄藝文一門祇載書之卷
帙及譌人名氏厥後隋唐諸史咸因之蓋述作之
體宜然也郡邑志乘雖不得比於列代之史然亦
史之支流也今修邑志既以前輩詩文分編入各
門俾以類相從所有藝文一門亦惟專收書名用
存一邑著述之大概其前人有所論說及現今有
所辨證者併附下方使來者有考焉

史要十卷佚

隋書經籍志史要十卷漢桂陽太守衛胤譔約史
記要言以類相從

案新唐書藝文志雜史有衛胤史記要傳十卷與
史要當卽一書至宋史藝文志不復著錄則其書
當亾於唐以後也

山陽公載記十卷佚

隋書經籍志樂資譔

修武縣志

卷九 藝文志

星

論語註十卷

佚

論語筆解二卷

存

許勃序曰昌黎文公著筆解論語一十卷其間翱翔者蓋李習之同與切磨世所傳率多譌舛始愈筆大義則示翱翔從而交相明辨非獨韓製此書也噫齊魯之門人所記善言既有同異漢魏學者注集繁闕罕造其精今觀韓李二學勤拳淵微可謂窺聖人之堂奧矣豈章句之技所可究極其旨哉予繕校舊本數家得其純粹欲以廣傳故序以發之

邵博曰張籍祭韓退之詩云魯論未訖注手跡今

修武縣志

卷九

藝文志

吳

微茫是退之嘗有論語傳未成也今世所傳寧予晝寢以晝作晝字三月不知肉味以三月作音字浴乎沂以浴作洽字至爲淺陋程伊川皆取之何邪

晁公武曰唐韓愈退之李翱習之譙前有祕書丞許勃序云韓李相與討論共成此書案唐人通經者寡獨兩公名冠一代蓋以此然四庫邯鄲書目皆無之獨田氏書目有韓愈論語十卷筆解兩卷此書題曰筆解而兩卷亦不同

王楙曰李漢序退之集云有論語注十卷後世罕傳然縉紳先生往往有道其二義者近時錢塘江

充家有是本王公存刻於會稽郡齋目曰韓文公
論語筆解自學而至堯曰二十篇文公與李翱指
摘大義以破孔氏之注正所謂三義者觀此不可
謂魯論未訖注後世罕傳也然觀聞見錄引三月
不知肉味三月作音字今所行筆解無此語往往
亦多遺佚或謂文公所解多改本文近於鑿僕又
觀退之別集答侯生問論語一書有日愈昔注解
其書不敢過求其義取聖人之旨而合之則足以
取信後生輩耳韓公以此自謂夫豈用意於鑿乎
陳振孫曰館閣書目云祕書丞許勃爲之序今本
迺王存序

修武縣志

卷九

藝文志

四

都穆曰唐李漢序韓文曰有論語解十卷傳學者
不在集中予家藏古本韓文有之但其說時與今
不同如六十而耳順解云耳當作爾猶言如此也
如會謂泰山不如林放乎解云謂當作爲言冉有
爲泰山非禮也如宰予晝寢解云晝當作晝宰予
四科十哲安得有晝寢之責如人之生也直解云
直惠字之誤言人生稟天地之大惠也如子所雅
言解云音作言字之誤也如三嗅而作解云嗅當
作鳴鳴之鳴雉之聲也如子在回何敢死解云死
當作先如浴乎沂解云浴當作浴如君子而不位
者有矣夫解云仁當作備如以杖叩其脛解云叩

當作指如君子貞而不諒解云諒當作讓如孔子時其亾也解云時當作待如鄉愿德之賊也解云鄉愿當作內柔已上諸說朱子嘗謂其鄙淺復曰爲伊川之學者皆取之及觀韓文有答侯生問論語書曰愈昔注其書而不敢過求其意取聖人之旨而合之則足以信後生輩耳然則朱子之所謂淺鄙固韓公之欲求信於後生者邪

欽定四庫全書提要論語筆解二卷舊本題唐韓愈李翱同註中間所註以韓曰李曰爲別考張籍集祭韓愈詩有論語未訖註手蹟今微茫句邵博聞見後錄遂引爲論語未成之證而李漢作韓愈集序

修武縣志

卷九 藝文志

吳

則稱有論語註十卷與籍詩異王楙野客叢談又引爲已成之證晁公武讀書志稱四庫邯鄲書目皆無之獨田氏書曰有韓氏論語十卷筆解兩卷是論語註外別出筆解矣新唐書藝文志載愈論語註十卷亦無筆解惟鄭樵通志著錄二卷與今本同意其書出於北宋之末然唐李匡乂宣宗大中時人也所作資暇錄一條云論語宰予晝寢梁武帝讀爲寢室之寢晝作胡卦反且云當爲晝字言其繪畫寢室今人罕知其由咸以爲韓文公所訓解又一條云傷人乎不問馬今亦謂韓文公讀不爲否然則大中之前已有此本未可謂爲宋人

偽撰且晝寢一條今本有之廢焚一條今本不載使作偽者剽掇此文不應兩條相逆摭其一而遺其一又未可謂因此依託也以意推之疑愈註論語時或先於簡端有所記錄翱亦閒相討論附書其閒迨書成之後後人得其彙本采註中所未載者別錄爲二卷行之如程子有易傳而遺書之中又別有論易諸條朱子有詩傳而朱鑑又爲詩傳遺說之例題曰筆解明非所自編也其今本或有或無者則由王存以前世無刊本傳寫或有異同邵博所稱三月字作音一條王楙所見本亦無之則諸本互異之明證矣王存本今未見魏仲舉刻

修武縣志

卷九

藝文志

晁

韓文五百家註以此書附末今傳本亦稀此本爲明范欽從許勃本傳刻前載勃序仍稱筆解論語一十卷疑字誤也又趙希弁讀書附志曰其閒翱曰者李習之也明舊本愈不著名而翱所說則題名以別之此本改稱韓曰李曰亦非其舊矣

唐順宗實錄五卷

存

晁公武郡齋讀書志右唐韓愈撰起貞元二十一年乙酉正月止永貞元年丙戌八月初愈撰錄書禁中事爲切直闖官不喜訾其非實在文宗時詔路隋刊正隋建言眾議以刊修非是李宗閔半僧孺謂史官李漢蔣係皆愈之壻不可參撰俾臣下

筆臣謂不然且愈之所書非己自出元和以來相
循逮今漢等以嫌無害公義請條其甚謬誤者付
史官刊定詔摘去元和永貞閒數事爲失實餘不
復改

陳振孫書錄解題唐史館修撰韓愈撰見愈外集
案志稱韓愈沈傳師宇文籍撰李吉甫監修新史
謂議者鬪然不息卒竄定無完篇以闒官惡其書
禁中事切直故也

韓愈集四十卷集外文一卷 存

晁公武郡齋讀書志右唐韓愈退之也南陽人貞
元八年進士累擢知制誥進中書舍人遷吏部侍

修武縣志

卷九

藝文志

三

郎爲京兆尹與李紳不協紳出愈罷爲兵部俄復
舊劉昫唐書稱愈恃才肆意盤孔孟之旨若南人
妄以柳宗元爲羅池神而愈碑以實之李賀父名
晉肅不應進士而愈作諱辨又爲毛穎傳譏戲不
近人情此文章之甚紕繆者新書稱愈三載而孤
自知讀書比長盡通六經百家學性明銳不詭隨
每言文章自相如子長後作者不世出故深探本
原卓然樹立成一家言造端置辭要爲不襲蹈前
人者議者謂舊史謂愈文章甚紕繆固不待辨而
新史謂造端置辭不蹈襲前人亦未爲知愈蓋愈
之置辭字字悉有依據其造端如毛穎傳進學解

之類皆有所師範云其集屢經名人是正其譌舛
絕少但編次殊失倫類有暇日者再宜編之
陳振孫書錄解題昌黎集四十卷外集十卷唐吏
部侍郎南陽韓愈退之譔李漢序漢文公壻也其
言辱知最厚且親收拾遺文無所失墜者懼後之
人僞妄輒附益其中也

又校定韓昌黎集四十卷外集十卷晦庵朱侍講
熹以方氏本校定凡異同定歸於一多所發明有
益後學外集皆如舊本獨用方本益大顛三書愚
案方氏用力於此書勤矣外集刪削甚嚴而存此
書以見其邀速常語初無崇信之說但欲明世閒

修武縣志

卷九 藝文志

至

問答之僞而不悟此書爲僞之尤也蓋由歐陽公
跋語之故不知歐陽公自以易大傳之名與己意
合從而實之此自通人之一蔽東坡固嘗深辨之
然其謬妄三尺童子所共識不待坡公也今文公
決以爲韓筆無疑方氏未足責晦翁識高一世而
其所定者迺爾殆不可解今案外鈔第七卷曰疑
誤者韓郁注云潮州靈山寺所刻末云吏部侍郎
潮州刺史者非也退之自刑部侍郎貶潮晚迺由
兵部爲吏部流俗但稱韓吏部爾其書蓋國初所
刻故其謬如此又潮本韓集不見有此書使靈山
有此刻集時何不編入可見此書妄也然其妄甚

白亦不待此而明

呂氏豫易說

佚

經義考元好問誌墓曰豫字彥先修武人自號南
峯山人

案呂氏易說錢大昕補元史藝文志亦收入易類
而不著卷數蓋其書久佚也

懶寄亭集

平雲山房集

未見

舊志明周佑譔佑字助也幼刻苦爲文萬歷戊戌
科進士官山西孝義縣知縣時開府某與佑有宿
憾遂投劾歸里居益邃於學四方以文請者趾相
錯

修武縣志

卷九

藝文志

三

清水篇

存

舊志明王玉鉉譔玉鉉字太阿少嗜學萬歷丙午
科鄉試第一

邑令徐應臺清水篇序略云深秋孤寂手壁閒殘
書了不得異人語一日有生捧一編至則前解元
王公遺草也纔檢一二葉輒覺光燄薄人追憶髫
年景慕以爲隔世人迺今步履先生之邱園攀其
花樹漱其澗泉接先生之子若弟則又依稀如見
先生也間攷水經甯北之黑山爲清水發源處瀑
布垂天雷聞數里幽室霧淵深不見底在魏晉之
交則有嵇阮諸君子而李唐則得愈若湘是皆生

有異秉而清流飛注實爲之浣腸洗髓於今迺有
太阿先生嘗憶丙午之役主者得其一論驚爲絕
倫遂鐫以程多士方謂葳蕤木天以鼓吹休明將
與韓公相上下而詎謂奄作古人邪雖然人之所
寶愛者帝天將取而賓之公之所以縣固於世者
且不獨在詩與文而况其夥然之形殼邪然而子
弟之珍其詩若文猶之其人也題成不可無月則
又滌其洗光溜響之所從來者而以清水名之卽
有不讀先生之書與不悉先生之爲人者但一詠
青青垂白龍之句便有以挹其芳香不遠矣

琅玕館集

讞牘焚餘正略

存

修武縣志

卷九

藝文志

三

舊志明張三就讓三就號竹林崇禎辛未科進士
初任山東朝城令多惠政報最調聊城攝濮州范
縣各建祠祀之擢兵部主事

清華集

車軒集

方外集

存

舊志明遂杲讓杲字光古貫通經史隱德弗仕案
朱彝尊明詩綜卷十遂昶字光古修武人有遂光
古集名與集名均與舊縣志不合又靜志居詩話
云光古詩學晚唐句如潭淨開天鏡山昏著霧巾
樹枝猿挂折花片鳥銜來僧舍竹松院人家瓜菜
園雲來羣壑暗日下半川明秋色老棲樹夕陽明
在山令賈島佛見之當亦點頭也又舟下淮水云

伐鼓下淮津川光迴暮色數峯雲外青一鳥沙上
白悠悠水驛浮颭颭風帆側舟人有嚴程知我歸
朝客又案竹垞於遠邇既有摘句則非目未睹其
集者而舟下淮水詩末句知我歸朝客則又似挂
名朝籍者與縣志隱德弗仕之說殊不相合而谷
應泰明史紀事本末曹石之變篇有錦衣指揮遂
果上言石亭謀不軌其人名列佞倖亦不傳其能
詩均莫能明也

浮園集

句湖集

水明樓集

存

舊志明王賓王譔賓王字太之號句湖孝友敦睦
購書萬卷己卯科副榜

修武縣志

卷九

藝文志

壽

又希齋詩

金丹詩

病餘草

未見

舊志 國朝范正宗譔正宗字晴麓拔貢生

范龍圖詩集

存

舊志 國朝范正脈譔正脈字介子童時卽工詩

著卯草爲王中丞漢所重長不滿五尺雙眸炯然

順治己丑擢進士選庶吉士授檢討以傲岸改戶

部主事出爲長蘆運同遷兩浙鹽運使未任卒正

脈嗜學遇異書必自手鈔讀喜交知名士視世俗

蔑如也所著有犖觀堂五雲館涼駕集讀騷齋煙

雲過眼亭諸刻其後合爲范龍圖詩集

教諭張宗泰范龍圖詩集序范生肖元攜其伯高

祖龍圖公詩集求序公原集有犖觀堂五雲館涼
駕集讀騷齋煙雲過眼亭諸目蓋仿古人一官一
集之意今本則以古今體分編取便檢閱義各有
當也龍圖之詩大抵五古不多作七古則跌宕淋
漓頗具勝場近體亦落落自將不染鉤章棘句之
習而自能稱其心之所欲言蓋當 國家文治初
開之日亦思以千秋自命者嘗考龍圖公登順治
己丑進士其時同捷南宮者有泰興季開生武進
董玉蚪或蜚聲諫苑或著名藝林均有文集行世
而宣城施愚山當日與漁洋聲價相埒又有南施
北宋之稱所謂一代詞宗也今統閱龍圖全集與

修武縣志

卷九

藝文志

五

諸君無一字倡酬遂令海內談詩之家至今莫有
能舉其姓名者可慨也然而古之詞人有兀傲偃
蹇厥名初不甚著迨閱世既久而其精光終發露
於陳編敗麓之中若在有神物呵護之者用此
知詩文之傳與不傳亦視乎所自爲者何如不盡
係乎聲華之喧闐否也據修武志乘龍圖嗜學如
飴非異書不讀初由進士授庶常旋改戶部主事
出爲長蘆運同又進兩淮鹽運使以龍圖之傲岸
不羈當日釐姦剔弊其政跡必有可觀者惜知交
中無有能表彰而稱述之使僅僅以詩傳也然卽
以詩而論凡宦海之浮沈勝跡之憑眺與夫友朋

故舊之聚首分袂無時無地不有詩以陶寫其性情亦足見唵咏之自關天懷也今范氏後人重取其遺集附之剗剔氏以永其傳行見家置一編龍圖之詩名當有彰徹遠邇藝林傳播於無窮者矣訂正喪禮儀節 新增等韻 韻學指掌圖 未見舊志 國朝李夢松謨夢松字蔭岐出就外傳卽過目成誦一時目爲神童稍長勤學好問補博士弟子員性孝友尤愛詩歌平居動履必謹邑人士咸樂與遊焉著述甚富皆足爲後學法由明經授桐柏縣學訓導甫抵任卒年七十有五

易圖說上下篇二卷 存

修武縣志

卷九

藝文志

五

金峩長山謨爲圖十有八河圖洛書圖圖書合數方圖圖書相借三角圖圖書相併三角圖河圖洛書相併三角圖河圖洛書加減乘除圖陰靜陽動圖陽動陰靜圖洛書勾股圖河圖畫八卦圖八卦次序圖伏羲六十四卦次序圖伏羲六十四卦方位圖後天改先天八卦方位圖先後天陰陽卦圖序卦圖一卦變八卦圖一卦變六十四卦圖爲說十有四上篇易總圖說河圖說洛書說河圖洛書合數說河圖洛書世代說下篇則圖書畫卦則書演疇說八卦所屬五行說八卦三圖合一說先天八卦相錯說後天改先天卦說後天六十四卦說卦

交說筌說跋開方圖說自序謂實案諸圖之象數而默識其精義妙道之所存雖出於獨闢戶牖之見然無一豪牽彊穿鑿譬如掘地得泉自然流出說心研慮不能自止惜以貧未能付梓其苦心不可沒也

靜完遺草二卷 附錄

明閩秀賈靜完謨靜完修武之待王鎮人靜完其自號也生於嘉靖己酉年十五河內謝守淳納爲側室年二十七而歿靜完生而聰慧弱齡卽喜讀書解爲文字著述甚富身後率皆散佚此本僅遺詩一卷雜體文一卷爲乾隆己酉河內范照藜所

修武縣志 卷九 藝文志

七

編次前有照藜序一篇謝守淳原序一篇又照藜題詞五首靜完得年不永詩文風格尙未底於老成然在閨閣之中可無庸苛論且其人清絜自守言動不苟絕不染華香蝶媚之習是可尙已

補遺

列女傳 補張氏楊朝清妻之後

王氏張九龍妻水南莊人道光十九年三月于歸
半載夫亾既殮後卽欲樞前盡節其姑防守甚嚴
未遂其志雖以姑之勸慰勉彊進食而日漸尪羸
及次年二月而亾年十九族閒無可取嗣其父王
漣請之於官著侯其夫兄弟生子先盡立繼

沙武縣志

卷之九

文